

PIRRO THOMO
Doktor i shkencave

MARRËDHËNIE NDËRMJET MËNYRËS SË TË BANUARIT DHE ASPEKTEVE TË NDRYSHME TË JETËS EKONOMIKE E SHOQËRORE

Gjurimet dhe studimet e arkitekturës sonë popullore të realizuara kryesisht gjatë dhjetëvjeçarëve të fundit kanë arritur në një gjerësi dhe thellësi të tillë saqë mund të themi se tashmë janë shqyrtuar të gjitha shfaqjet e saj në krahina e qendra të ndryshme. Detyrat kryesore që synonin të zgjidhnin studimet për trashëgiminë ndërtimore ishin: klasifikimi tipologjik mbi bazën e kriterëve thelbësorë, ndjekja e dinamikës së zhvillimit, konsolidimit dhe ndryshimit të tipave në periudha të ndryshme historike, përcaktimi i kufijve të shtrirjes së strukturës tipologjike, shfaqjet e larmishme të tipave të veçantë në krahina apo qendra të ndryshme, përcaktimi i tipareve arkitektonike, konstruktive e dekorative të tipave e varianteve, si dhe probleme të tjera të këtij karakteri.

Tani që çështjet e mësipërme, në vijat themelore, janë sqaruar dhe harta e shpërndarjes gjeografike të tipologjisë së arkitekturës popullore thuajse është plotësuar, mund të shkojmë më tej: Ç'raporte krijojnë me njëri-tjetrin elementet e ndryshme të mënyrës së jetesës? Si ka lëvizur ky raport në periudha, krahina e qendra të ndryshme? Ndryshimi i karakterit të këtyre marrëdhënieve merr rëndësi të veçantë, sepse, nga njëra anë, do të mund të sqarojmë shumë procese e dukuri të zhvillimit të arkitekturës popullore dhe të depërtojmë në ligjësitë që udhëheqin këtë zhvillim, nga ana tjetër, nëpërmjet të dhënave të nxjerra nga studimi i trashëgimisë ndërtimore do të mund të plotësohet tabloja e mënyrës së jetesës ose të bëhet rindërtimi i saj kur të dhënat janë të mangëta.

Është e kuptueshme që karakteri i këtyre marrëdhënieve nuk mund të sqarohet me një studim. Në këtë artikull do të bëjmë përpjekje t'i afrohem këtij problemi, ose, më saktë, disa anëve të tij, aq sa na lejon gjendja e studimeve në fushën e arkitekturës popullore dhe në fushat e tjera të etnografisë.

Veprimtaria ndërtimore i ka shoqëruar hap pas hapi përpjekjet e njerëzimit për shndërrimin e natyrës, për t'i shpëputur asaj të mirat materiale për sigurimin e jetesës. Në këtë mënyrë veprimtaria ndërtimore, në përgjithësi, dhe mënyra e të banuarit, në veçanti, janë bërë pjesë e pandarë dhe shumë e rëndësishme e mënyrës së jetesës.

Kërkesat jetësore të shoqërisë kanë shtyrë vazhdimisht drejt kërimit të zgjidhjeve të përshtatshme ndërtimore, ndërsa arritjet ndërti-

more e kanë pasuruar mënyrën e jetesës, kanë krijuar kushte më të favorshme dhe kanë nxitur përmirësime të mëtejshme.

Në studimet e derisotme lidhjet organike ndërmjet mënyrës së të banuarit dhe mënyrës së jetesës kanë qenë ndër kriteret më të rëndësishme për sqarimin e shumë proceseve dhe dukurive të arkitekturës popullore, sidomos për klasifikimin tipologjik të saj. Ndërmjet shumë kriterëve të mundshme, është zgjedhur ai që merr për bazë kompozimin planimetriko-vëllimor të banesës. Ky tipar krijon lidhjen ndërmjet mënyrës së jetesës në përgjithësi, të përfaqësuar nga programi ose tërësia e kërkesave që shtrohen përpara ndërtuesit, dhe materializimit të kërkesave nga veprimtaria ndërtimore në vendbanim, oborr, banesë apo mjedis të saj.

Sigurisht që për formimin e plotë të një tipi të dhënë, përveç kërkesave të porositësit, ndikojnë edhe faktorë të tjerë, si: terreni, klima, materialet dhe mjeshtrit e ndërtimit etj. Por edhe këta faktorë, në një mënyrë ose në një tjetër, drejtpërdrejt ose tërthorazi, janë të lidhur me mënyrën e jetesës në një kuptim më të gjerë të saj. Terreni i thyer malor apo i rrafshët kushtëzon natyrën e ekonomisë bazë të familjes, e cila, nga ana e saj, shtron kërkesa specifike për ndërtim. Mjeshtrit e ndërtimit, të dalë nga gjiri i popullit dhe të familjarizuar me kërkesat e mënyrës së tij të jetesës, kanë ditur të orientohen drejt e shpejt për të gjetur zgjidhje të përshtatshme, sipas kushteve konkrete në krahina a qendra të ndryshme. Përsa u përket tipareve të ndërtimeve, këta faktorë luajnë një rol të rëndësishëm në zgjidhjen konstruktive, në metodat dhe teknologjinë e ndërtimit, deridiku edhe në nivelin e trajtimit arkitektoniko-dekorativ.

Lidhja e çdo elementi të tipologjisë me mënyrën e jetesës duket dhe në shkallën e lëvizshmërisë apo të ndryshueshmërisë së tij. Kështu, për shembull, ndryshimet në mënyrën e jetesës sjellin ndryshime të rëndësishme, që prekin në radhë të parë dispozicionin planimetrik të banesës, ndërsa zgjidhjet konstruktive, materialet dhe teknika e ndërtimit qëndronë më konservatore. Megjithatë, mbasi fillonte të kristalizohej një tip i ri, ai kërkonte edhe ndryshime në teknikën e materialet e ndërtimit, në përdorimin e koncepteve të reja konstruktive me mundësi më të mira shprehëse për zgjidhjet e reja tipologjike.

Ndër faktorët më aktivë, karakteri dhe ndryshimi i të cilëve le gjurmë në aspekte të ndryshme të mënyrës së jetesës, duke përfshirë këtu edhe atë të banuarit, janë faktorët ekonomikë e shoqërorë. Prandaj së pari le të ballafaqojmë të banuarit me mënyrën e sigurimit të jetesës, pra me faktorin ekonomik dhe me mënyrën e organizimit të jetesës, pra me faktorin shoqëror.

Mënyra e sigurimit të jetesës ndjehet që në organizimin e territorit të banuar. Sipas pozitës topografike dallojmë vendbanime fushore, të ndërmjetme ose kodrinore dhe malore. Vendbanimet kishin territorin e tyre të përcaktuar qartë të ndarë me kufij; ai përbëhej kryesisht nga zona e banuar dhe ajo ekonomike. Në zonën e banuar përfshihen banesat së bashku me oborret e tyre, ndërsa në atë ekonominë tokat e punuara, kullotat, pyjet etj. I gjithë ky territor i nënshtrohej një veprimtarie ndërtimore. Madhësia e këtij si dhe lloji dhe intensiteti i kësaj veprimtarie vareshin nga nevojat dhe kërkesat e bashkësisë fshatare

për sigurimin e mjeteve të jetesës. Kjo veprimtari mund të ishte e kufizuar vetëm në banesë, në oborrin e saj dhe në ngritjen e disa instalimeve ekonomike; ajo mund të ishte më e gjerë të përfshinte, përveç elementeve të mësipërme, edhe punime për hapjen e tokave të reja nëpërmjet punimeve të tarracimit, veprave ujitëse etj.

Por edhe në elementet e njëjta, dendësia e veprimtarisë ndërtimore ishte e ndryshme në varësi të ekonomisë bazë. Kjo duket qartë në oborrit e banesës. Pasuria apo varfëria e ndërtimeve ndihmëse brenda oborrit të banesës varej kryesisht nga karakteri i ekonomisë së ushtruar dhe nga gjendja ekonomike e familjes. Oborri i një familjeje me drejtim kryesor blegtoral, veprimtaria ekonomike e së cilës, mbajtja e bagëtive dhe përpunimi i produkteve blegtorale, bëhej thuajse larg shtëpisë, zakonisht ishte i vogël dhe përmbante një minimum të domosdoshëm ndërtimesh ndihmëse. Ndryshe organizohej oborri i një familjeje që kishte si drejtim kryesor bujqësinë. Vetë karakteri i punës kërkonte instalime të shumta si për përpunimin e produkteve bujqësore, ashtu dhe për depozitimin e tyre. Përveç tyre kërkohejshin ndërtime të tjera për mbajtjen e kafshëve të punës dhe të ushqimit të tyre, për vendosjen e veglave bujqësore etj. Por familjet fshatare thuajse asnjëherë nuk kishin ekonomi të pastër bujqësore apo blegtorale. Gjerësisht të përhapura ishin ekonomitë e përzjera bujqësore-blegtorale, me mbizotërimin e njërës apo tjetrës degë. Në varësi të përpjesëtimeve që krijoheshin midis përbërësve të ekonomisë së familjes fshatare shkonte dhe shkalla e pasurisë së ndërtimeve ndihmëse të oborrit: përveç instalimeve dhe ndërtimeve ndihmëse për ekonominë bujqësore, oborri pasurohej dhe me ndërtime për strehimin e bagëtive dhe depozitimin e ushqimit të tyre, si: kasolle, haure, vatha etj. dhe anasjelltas.

Ndikimi i faktorit ekonomik ndjehet dhe në organizimin e oborrit dhe të banesës qytetare. Me gjithë drejtimin kryesor zejtaro-tregtar të ekonomisë së qëndrave qytetare, familjet nuk ishin të shkëputura plotësisht nga ekonomia agrare, e cila u siguronte të ardhura dhe mjete të konsiderueshme jetese. Përveç kësaj, krahas zejtarive të organizuara, të cilat e ushtronin veprimtarinë e tyre prodhuese kryesisht në tregun e qytetit, një vend me rëndësi në jetën e familjes qytetare zinte dhe zejtaria shtëpiake e ushtruar kryesisht nga gratë. Kjo ekonomi e përzjer njohu shkallë të ndryshme përhapjeje dhe fuqie në periudha apo qendra të ndryshme. Pikërisht ndryshueshmëria e raporteve të degëve të ndryshme, ishte një nga faktorët shtytës të zhvillimit e të transformimeve të organizimit urbanistik e të tipologjisë së banesës qytetare.

Gjatë mesjetës së vonë, kur ruheshin ende gjurmë të forta të ekonomisë së mbyllur natyrore, në kuadrin e së cilës familja siguronte vetë pjesën më të madhe të mjeteve të jetesës, të gjitha këto degë të ekonomisë: zejtaria e organizuar, tregtia, zejtaria shtëpiake dhe bujqësia ushtroheshin, ku më shumë e ku më pak, në të gjitha qendrat qytetare të vendit. Në qytetet e Shqipërisë së Mesme: Elbasan, Tiranë, Kavajë, në qytetin e Shkodrës, në një pjesë të familjeve të Beratit etj., këto degë morën një zhvillim të plotë dhe ndikuan fuqishëm në oborrin e banesës dhe në parapëlqimin për tipa të caktuar banese. Në këto qendra mbizotëruan banesat e hapura, ato me hajat e me çardak, tremet e të cilave, me hapësirat e tyre të mëdha, shërbenin edhe për kryerjen e punëve të

ndryshme të ekonomisë bujqësore apo artizanale. Ato zakonisht rrethoheshin nga oborre të gjera, ku përfshiheshin, përveç ndërtimeve ndihmëse, edhe parcelat e kopshteve.

Përveç oborrit të banesës, që kushtëzon në një shkallë të rëndësishme hapësirën e banuar, faktori ekonomik ka ushtruar ndikimin e tij edhe në organizimin urbanistik të kësaj hapësire. Kështu për shembull, në disa vendbanime fshatare, si pasojë e sipërfaqeve të mëdha të oborreve dhe e përfshirjes në to edhe të tokave të bukës, janë krijuar struktura urbanistike të shpërndara. Këto struktura janë më të theksuara në vendbanimet e ngritura në terrene që siguronin me vështirësi tokat e bukës. Për t'i kërkuar këto toka familjet ishin të detyruara të largoheshin nga trugu amtar ose nga territori i banuar fillestar. Territori i shtrirë, rrjeti i dendur e kapilar i rrugicave, gjelbërimi i shumtë, silueta përgjithësisht e shtrirë etj., ishin tipare të disa qendrave qytetare, të cilat i patën më të forta dhe më të qëndrueshme në kohë lidhjet me ekonominë agrare.

Faktorët ekonomikë kanë luajtur një rol të rëndësishëm jo vetëm në formulimin e tipareve urbanistike të vendbanimeve, por edhe gjatë krijimit të tyre. Studimet për vendbanimet mesjetare kanë evidentuar një sërë rastesh ku vërehet dukuria e zbritjes së vendbanimeve nga zonat malore drejt ultësirave, Arsytet ekonomike, si: prirja për fuqizimin e drejtimit bujqësor, hyrja e kulturave të reja bujqësore, kalimi nga sistemi i timareve në sistemin e çifligut etj., kanë qenë ndër shkaqet më kryesore të kësaj zhvendosjeje.

Popullsia me drejtim ekonomik blegtoral njihte edhe vendbanimet e dyfishta. Përveç vendbanimit të përhershëm dhe të vjetër në zonat malore, disa bashkësi fshatare kishin dhe territorin e kullotave dimërore në viset e ulta. Këto territore në fillim kishin karakter të përkohshëm banimi, më pas u populluan me një pjesë të familjeve të zbritura nga vendbanimi fillestar dhe u kthyen në vendbanime të përhershme, duke mos humbur asnjëherë lidhjen dhe kujtimin e prejardhjes së tyre. Traditat, zakonet, veshjet dhe aspekte të tjera të mënyrës së të jetuarit kanë mbetur të njëjta me ato të origjinës.

Një dukuri tjetër me interes për çështjen që shqyrtojmë shfaqet sidomos në krahinat e Shqipërisë Qendrore ku janë të shumta vendbanimet që, krahas emërimit kryesor, marrin shtesat: *Mal*, *Katund*, *Zall*, të cilat dëshmojnë edhe për mënyrën e formimit të tyre. Territori i vendbanimit, i ndarë në breza, tradicionalisht ruante dhe një zonim funksional: në brezin e mesëm shtrihej zona e banuar, në të sipërmin ishte zona e staneve ose e kullotave verore, ndërsa në brezin e poshtëm zona e dimërimit të bagëtive. Me kalimin e kohës zonat ekonomike u kthyen në vendbanime të përhershme, duke ruajtur emrin e origjinës dhe cilësonin e pozitës.

Në ndikimin e tyre mbi veprimtarinë ndërtimore faktorët ekonomikë bashkëveprojnë me faktorë të tjerë, veçanërisht me faktorët shoqërorë. Edhe shkalla e veprimit të faktorëve shoqërorë është e ndryshme në kohë, krahina apo qendra dhe në përbërës të ndryshëm të veprimtarisë ndërtimore.

Në momente të caktuara historike, kur janë zgjeruar vendbanimet ekzistuese ose janë formuar vendbanime të reja, faktori shoqëror luan një

rol parësor. Në këto raste toponimia vjen në ndihmë për sqarimin e origjinës së vendbanimit. Deri në ditët tona ruhen emërtime fshatrash, që rrjedhin nga emra të parësh të fisit ose të familjeve. Emërtimet e tilla janë më të shpeshta për lagjet e veçanta. Kjo dëshmon se lagjja ose fshati në zanafillë kishin karakterin e aglomeracioneve të vogla, të banuara nga familje me lidhje farefisnie. Në popull ka mbetur kujtimi i ndarjes së familjeve në vendas dhe të ardhur. Sigurisht që futja e familjeve të ardhura në një bashkësi vendase të formuar nuk ka qenë një proces i thjeshtë dhe i pranuar pa rezistencë. Familjet e ardhura zunë vend në troje të reja, pranë territorit të vendbanimit ekzistues dhe aty u shtuan e u zhvilluan, duke mbetur në disa raste si lagje më vete, duke krijuar në raste të tjera fshatra të reja, ose duke u shkrirë në vendbanimin e vjetër për të krijuar bashkësi territoriale më të gjëra dhe të përziera.

Një dukuri e tillë ishte karakteri edhe për qytetet, sidomos në fazën e rritjes së tyre territoriale dhe numerike. Dokumentacioni i mesjetës së vonë bën fjalë për emërtime lagjesh sipas familjeve që i popullonin, profesionit bazë, prejardhjes së familjeve, madje dhe sipas përkatësisë etnike. Në sajë të zhvillimit më të vullshëm të qytetit, procesi i shuarjes së kufijve të ndarjeve apo i aglomeracioneve të vogla dhe krijimi i njësive më të mëdha territoriale ishte më i shpejtë se në fshat. Kjo dukuri u pasqyrua dhe në humbjen e emërtimeve fillestare të lagjeve.

Në qytet, ndikimi i faktorit shoqëror gjen shprehje më të plotë në organizimin e përgjithshëm të strukturës urbanistike të tij. Ky ndikim shfaqet më i fortë gjatë mesjetës së vonë në dy aspekte kryesore të organizimit të hapësirës urbane: në zonimin e ansambleve dhe në zgjedhjen e trojeve të ndërtimit. Qyteti gjatë mesjetës së vonë i kishte të dalluara qartë ansamblet, qoftë përsa i përket funksionit, qoftë përsa i përket përbërjes sociale të popullsisë. Ekzistonte një ndarje e madhe ndërmjet zonës së banuar, qendrës administrativo-fetare dhe ansamblit zejtaro-tregtar ose tregut të qytetit. Në disa raste, përveç këtyre ansambleve veçohej dhe zona ekonomike ku ushtrohej ekonomia agrare e familjeve. Vetë zona e banuar ruante ndarje të dallueshme sipas përkatësisë sociale dhe fetare të popullsisë. Kështu veçoheshin lagjet e popullsisë myslimane nga ato të krishterë, lagjet e populluara prej shtresave të ardhura fshatare, apo të zanatçinjve të varfër a të zejeve të përbuzura, lagjet ku banonin jevgjit etj.

Aspekti i dytë shfaqet në parapëlqimin e zgjedhjes së trojeve sipas pozitës shoqërore. Kështu për shembull, paria e vendit dhe shtresat sunduese në shekujt e parë mbas pushtimit osman u vendosën nëpër kalatë e qyteteve, të cilat u siguronin mbrojtjen e nevojshme. Me stabilizimin e jetës qytetare, kalatë e humbën rolin e tyre si qendra administrativo-ushtarake dhe rezidenciale. Territori i kufizuar i tyre pengonte zhvillimin e lirë të hapësirë për banim, kështu që shtresat sunduese i braktisën kalatë dhe u vendosën pranë qendrave të reja qytetare. Trojet e mira dhe me kushte të favorshme për zhvillimin ekonomik u zotëruan gjithashtu nga shtresat e pasura ose nga ato që gëzonin privilegjet e sunduesit. Në këtë mënyrë shtresave me pozitë shoqërore të ulët apo të diskriminuar u mbetën trojet më të papërshtatshme për ndërtim, në terrene të thyera dhe me pak hapësirë jetësore.

Kushtet e mësipërme shoqërore ushtruan në një masë të konsiderueshme ndikimin e tyre në fizionominë urbanistike të vendbanimit. Në vendbanimet fshatare shumë të përhapura ishin strukturat e grupuara, të formuara nga lagjet ose nga grupimet më të vogla të ndërtimeve të familjeve me lidhje farefisnie. Ndryshime të fizionomisë urbanistike të fshatrave vërehen edhe brenda një krahine të vetme. Kështu për shembull, në Devoll të Korçës ka pasur fshatra me popullsi myslimane dhe të krishterë. Në fshatrat e krishtera mbështetje e rëndësishme e familjeve ishte zejtaria. Për vetë pozitën shoqërore dhe drejtimin ekonomik të tyre, më e përshtatshme ishte një mënyrë jetese kolektive, që shprehej jo vetëm në organizimin e brendshëm shoqëror, por edhe në mënyrën e të banuarit, me shtëpi pranë ose ngjitur me njëra-tjetrën. Kjo mënyrë shprehte një strukturë urbanistike të ngjeshur; zona ekonomike ndodhej zakonisht jashtë fshatit. Përkundrazi, në fshatrat myslimane që mbështeteshin në ekonomi agrare, mënyra e jetesës ishte më individuale, ekonomitë të ndara nga njëra-tjetra dhe, rrjedhimisht, struktura urbanistike ishte disi më e shpërndarë.

Në varësi të strukturës sociale dhe trojeve të ndërtimit ndryshonte dhe struktura urbanistike edhe brendapërbrenda qytetit. Ansamblet ose lagjet e banuara nga shtresat e gjëra të zanatçinjve, qoftë kur shtriheshin në troje të thyera (për shembull, në Berat), qoftë kur zinin trojet e rrafshta (si në Korçë) dalloheshin nga një fizionomi e ngjeshur dhe kompakte, me banesa pranë ose ngjitur njëra-tjetrës. Arsyet e kësaj ngjeshjeje janë të kuptueshme: nevojat e mbrojtjes kolektive, shtrenjtësia e truallit të ndërtimit në terrenet e rrafshëta dhe shtrirja disi e kufizuar e tij në terrene të pjerrta etj, janë disa nga faktorët që kushtëzuan këtë fizionomi.

Se sa i fortë ishte ndikimi i faktorit shoqëror në organizimin e hapësirës urbane duket sidomos në periudhat kur shfaqeshin ndryshime të marrëdhënieve ekonomiko-shoqërore. Në mes të shekullit XIX po thyhej izolimi krahinor, po lëkundej ekonomia e mbyllur natyrore dhe po depërtonin gjithnjë e më tepër marrëdhëniet kapitaliste. Këto ndryshime po krijojnë struktura të reja në gjithë jetën shoqërore të qyteteve. Qendrat tradicionale ku përqëndrohej jeta shoqërore e qyteteve, si: institucionet e kultit, pazari i qytetit dhe vetë banesa e familjes po e humbisnin rëndësinë e tyre. Si pasojë e kërkesave të reja të mënyrës së jetesës dhe e ndryshime të organizimit të veprimtarisë ekonomike, banesa pëson ndryshime të rëndësishme ose lindin tipa të rinj, ndërsa tregu humbi disa nga funksionet e tij. Jeta shoqërore bëhet më e gjallë e më e hapur, kërkesat e saj plotësoheshin nga ansamblet ose ndërtimet me karakter publik. Të tilla ishin rrugët ose arteriet e reja të qytetit, të cilat u mbushën me ndërtime tregtare e shoqërore, lulishtet apo kopshtet publike etj., që thithnin fluksin më të madh të lëvizjes dhe u kthyen në qendra shoqërore, tregtare e kulturore. Nga ana urbanistike këto arterie ose ansamble u bënë boshte ose qendra bazë, që nënshtuan zhvillimin e mëtejshëm urbanistik. Hapja e jetës shoqërore, zgjerimi i mëtejshëm i qyteteve, futja e kritereve të reja në urbanistikë e në arkitekturë, po ia ndryshonin fizionominë qytetit mesjetar, tashmë të vjetëruar në konceptim, organizim dhe siluetë. Megjithatë, disa tipare karakteristike për sho-

qëritë klasore si dallimet shoqërore e fetare, mbetën, ndonëse jo kaq të dukshme si më parë.

Faktori shoqëror ushtroi një ndikim të ndjeshëm dhe mbi tipologjinë e banesës. Studimet klasifikuese të arkitekturës popullore kanë vënë në dukje se çdo tip banese përmban diku më të pasur e diku më të varfër një strukturë morfologjike, e cila shprehet në numrin e varianteve të nënvarianteve konkrete. Ndër shkaqet e kësaj larmie janë dhe niveli i zhvillimit ekonomiko-shoqëror i një periudhe, krahine apo qendre të dhënë, nga njëra anë, dhe pozita ekonomiko-shoqërore e një shtresa apo familjeje të caktuar, nga ana tjetër. Kushtëzimi i parë gjen pasqyrim në fazat e zhvillimit dhe të përhapjes së tipave dhe varianteve të banesës, ndërsa kushtëzimi i dytë në shkallën e përpunimit arkitektoniko-dekorativ të tipit si dhe në faktin që shtresa të ndryshme shoqërore, brenda një periudhe, krahine apo qendre, adoptojnë variante të ndryshme banese.

Ajo që e pasqyron më dukshëm diferencimin ekonomio-shoqëror është shkalla e përpunimit arkitektoniko-dekorativ të banesës. Shtresat e kamura të popullsisë, në qytet e fshat, qoftë për botëkuptimin e tyre, që synonte të tregonte edhe së jashtmi rangun apo pozitën e tyre, qoftë për mundësitë më të mëdha ekonomike, parapëlqenin variantet më të zhvilluara të një tipi banese. Ndërtimet e tyre dalloheshin nga përpunimi i pasur dekorativ i pamjeve të jashtme, sidomos i interiereve, ku gjejmë realizime të larta në gdhendjet në dru, gur apo punime në shtukreliev, hekur etj.

Rrethanat historiko-shoqërore lenë gjurmë në tipologjinë e banesës edhe në një mënyrë tjetër. Veçimi krahinor, arbitrariteti dhe dhuna e ushtruar nga klasat sunduese, turbullimet e shpeshta, si dhe luftërat e grindjet e brendshme ndërmjet fiseve, klaneve dhe familjeve të pasura ose frika e këtyre të fundit nga revolta e masave, krijonin një gjëndje pasigurie, e cila pasqyrohet edhe në banesë, në kërkesën për tipa të mbrojtur. Elementet mbrojtëse të banesës patën përhapje të madhe; përpunimi i vazhdueshëm i tyre çoi në format më të përkryera të banesës së fortifikuar në disa krahina (Mat, Malësinë e Gjakovës) dhe në qendra (Gjirrokastër) të vendit.

Siç e shohim, faktorët ekonomikë e shoqërorë ndikojnë veçanërisht në formulimin e kriterëve të përgjithshme të organizimit të hapësirës jetësore dhe të tipologjisë së banesës. Përsa u përket zgjidhjeve më konkrete dhe në njësi më të vogla e të përditshme të veprimtarisë ndërtimore, këta faktorë e ushtrojnë veprimin e tyre nëpërmjet familjes, e cila ka një fushë më të gjerë për të diktuar kërkesat e veta. Le të analizojmë si veprojnë dy tipare kryesore të familjes: përbërja numerike e saj dhe struktura ose organizimi i brendshëm.

Është e kuptueshme se një familje me shumë pjesëtarë kërkon një banesë me shumë ambiente dhe anasjelltas. Shtimi numerik i familjes sillte nevojën imediat për ambiente të reja. Mënyra më e shpeshtë dhe më e thjeshtë e plotësimit të saj ishte veçimi i kthinave brenda ambienteve ekzistuese. Ndërtimet e reja ngjitur me banesën fillestare ose në një oborr me të, përbënin një tjetër rrugë për plotësimin e kësaj nevoje. Në këto ndërtime kalonin disa funksione të banesës kryesore, zakonisht

shtëpia e zjarrit, më vonë edhe ahuret e bagëtive, ndërsa ambientet fillestare ktheheshin në dhoma fjetjeje për kurorët e reja. Këto ndryshime prekin zgjidhjen kompozicionale të banesës dhe, ndonëse nuk e tjetërsonin plotësisht, e modifikonin atë.

Por këto ndryshime kishin një kufi të caktuar zbatimi, aq sa u lejonin hapësirat ekzistuese. Më tej kërkesat e rritjes së familjes zgjidheshin me ndërtime të reja, më të plota në konceptim. Në rastet kur familja shpërbëhej, ndërtimet e reja mund të ngriheshin dhe larg banesës mëmë. Por, për arsye të ruajtjes së fuqisë ekonomike, të krahëve të punës ose të fuqisë mbrojtëse, ndërtimet e reja ngriheshin më shumë pranë së vjetrës, duke krijuar grupime ndërtimesh familjare. Këto grupime, në disa raste u bënë embrione të lagjeve të reja ose i dhanë një karakter specifik strukturës urbanistike të vendbanimit.

Në shumicën e rasteve zgjerimi i banesës nuk i nënshtrohej spontaneitetit. Si pasojë e një tradite të ngulitur në mënyrën e jetesës, bëhej dhe parashikimi i zgjidhjeve ndërtimore. Zgjidhjet më të shpeshta kanë dhënë banesat «vëllazërishte». Zakonisht ato ishin përsëritje ose bashkëngjitje e dy apo më tepër njësive kompozicionale të formuara dhe dalloheshin nga simetria thuajse e plotë në kompozim dhe në elemente të veçanta të bërthamave karshi mureve ndarës. Në rastet e komplekseve ndërtimore më të zhvilluara të familjeve me shumë pjesëtarë, ndërtimet e veçanta të kompleksit gjenin zgjidhje kompozicionale në përputhje të plotë me destinacionin e ndërtimit.

Në qoftë se numri i ambienteve, në një masë të konsiderueshme ishte në varësi të madhësisë së familjes, kompozimi i ambienteve ose i elementeve të veçanta të tij, vendi dhe roli i tyre, i bindej, ndër të tjera, edhe organizimit të familjes, funksioneve të familjes ose pjesëtarëve të saj. Në kushtet e një jete përgjithësisht të mbyllur, banesa ka qenë një qendër e rëndësishme, në të cilën ishte përqëndruar jo vetëm pjesa më e madhe e veprimtarisë ekonomike, por edhe shumë shfaqje të jetës shoqërore të familjes. Kjo dukuri vërehej si në fshat, ashtu dhe në qytet, sidomos gjatë mesjetës së vonë. Këto rrethana gjetën pasqyrim në banesë, në pavarësinë dhe vendin që zinin ambientet në kompozim. Le të analizojmë dy nga ambientet kryesore të banesës shqiptare: shtëpinë e zjarrit dhe dhomën e miqve.

Shtëpia e zjarrit ka qenë bërthama fillestare e zhvillimit të banesës dhe ambienti kryesor ku zhvillohej jeta familjare. Atje gatuhej, merrej ushqimi dhe flinin të moshuarit e fëmijët. Në familjet e mëdha shtëpia e zjarrit ishte njëkohësisht dhe ambienti i grumbullimit të familjes, ku rriheshin problemet e brendshme të saj dhe bëhej ndarja e punës. Me këto funksione kaq jetësore, shtëpia e zjarrit zinte një vend të rëndësishëm në banesë. Rastin më të skajmë e paraqet «banesa me shtëpi zjarri përgjatë dy kateve» ose «banesa tiranase», e përhapur kryesisht në qytetin e Tiranës dhe në krahinat përreth. Në këtë tip banesë shtëpia e zjarrit me përmasa të mëdha në plan dhe lartësi zë një vend qendror, duke u bërë qendra kompozicionale e banesës, rreth së cilës zhvilloheshin dhe komunikoni ambientet e tjera të banesës, të vendosura në dy kate.

Por, ndërsa në jetën e brendshme të familjes shtëpia e zjarrit zë një vend parësor, në marrëdhëniet e familjes me rrethin e jashtëm marrin përparësi ambientet paraqitëse dhe, në radhë të parë, dhoma e miqve.

Në banesat e thjeshta me dy ambiente, dhoma e miqve zë një vend të dukshëm dhe, në sajë të trajtimit arkitektonik, ajo është e dallueshme edhe së jashtmi. Në banesat me kate vendoset në katin më të sipërm. Në komplekset e ndërtimeve familjare, shtëpia e miqve zakonisht ngrihej pranë portës së oborrit. Shpesh hyrja për në dhomën e miqve bëhej e veçantë dhe larg lëvizjeve të zakonshme të njerëzve. Kjo ndodh edhe për shkak të fanatizmit të thellë, të normave morale të fesë islame që e izolonin gruan dhe e ndalonin të dilte përpara të huajve. Por zbatimi i këtij kriteri edhe nga popullsia e krishterë dëshmon për përkujdesjen e veçantë që i kushtohej mikpritjes dhe komoditetit të mikut. Përmasat e mëdha dhe trajtimi i pasur arkitektoniko-dekorativ, ishin tipare të tjera të dhomës së miqve, të iclat ndihmonin për plotësimin e rolit shoqëror që luante ky ambient në jetën e familjes. Për ta bërë sa më të këndshëm qëndrimin, dhoma e miqve pajisej me elemente të tilla, si *qoshqe* e *erker*a, ose i shpërndante funksionet e saj edhe në ambiente të tjera që e paraprinin, si *divanhane*, *hajate* e *çardaqe*, që trajtoheshin dhe pajiseshin në përputhje me këto funksione.

Mënyra e jetesës në familje kërkonte që ambientet të kishin karakter polifunksional. Në rastin e shtëpisë së zjarrit ky karakter ishte më i qartë, ndërsa në dhomën e miqve, mobilimi me orendi fikse, krijonte sipërfaqe të madhe, të lirë për përdorim sipas nevojës: për pritje, meqenëse ndenjja bëhej në shesh, për ngrënie, që kryhej në sofra lehtësisht të lëvizshme, dhe për fjetje, duke shtruar dyshekë në shesh.

Ndryshimet që ndodhën në banesën qytetare dhe pjesësisht edhe në atë fshataren, duke filluar nga mesi i shekullit XIX, prekën edhe tiparet e mësipërme, domethënë funksionin shoqëror të banesës, në përgjithësi, dhe të dhomës së miqve, në veçanti, si dhe karakterin polifunksional të ambienteve. Kjo erdhi si pasojë e rritjes së rolit shoqëror të qytetit, e ngritjes së ndërtimeve publike, e shpërbërjes së familjeve të mëdha, si dhe e ndryshimeve në organizimin ekonomik, e futjes së prodhimeve të gatshme e të industrializuara, që i dhanë goditje jo vetëm artizanatit të organizuar, por edhe atij shtëpiak.

Kësaj mënyre të re jetese banesa iu përgjigj me zvogëlimin e përmasave të ambienteve, me thjeshtimin e dekoracionit të brendshëm, me eliminimin e orendive fikse dhe me futjen e mobiljeve, duke kryer në këtë mënyrë dhe individualizimin e ambienteve. Gjatë këtij procesi shtëpia e zjarrit humbi një pjesë të funksioneve, madhësia e saj u reduktua, duke humbur njëkohësisht dhe rolin që luante në kompozim dhe duke u kthyer, në shumicën e rasteve, në një kthinë kryesisht për gatim. Rikonstruksioni i tipologjisë tradicionale i kryer gjatë kësaj periudhe në mbarë qytetet tona, banesën tiranase e preku më tepër te shtëpia e zjarrit; ai eliminoi këtë qendër dhe duke e njësuar me ambientet e tjera. Ndërkaq dhoma e miqve vazhdoi të ruajë rëndësinë e saj, ndonëse jo si përpara.

Po t'i përmbledhim shkurtimisht ato çka analizuam më sipër, do të arrijmë në përfundimin se faktori ekonomik ka ndikuar fort në mënyrën e formimit të vendbanimeve, në pasurinë apo varfërinë e oborrit të banesës në ndërtime ndihmëse, në parapëlqimin për tipa të caktuar banese,

ambiente apo elemente, të cilat nga ana e tyre, kushtëzuan karakterin urbanistik të vendbanimit dhe trajtimin arkitektonik të banesës. Mbi këta përbërës të veprimtarisë ndërtimore ka vepruar edhe faktori shoqëror, po me një rrugë tjetër e me shkallë të ndryshme intensiteti.

Gjatë zhvillimit historik krahina apo qendra të ndryshme të vendit janë ndodhur në kushte të njëjta apo të përafërta ekonomike e shoqërore. Duke njohur përparësinë e faktorëve ekonomikë e shoqërorë, duhet të pranojmë se shumë anë të programit ose të kërkesave të shtrutura për plotësim, si dhe shumë kritere apo parime të përdorura për zgjidhjen e këtyre kërkesave kanë qenë po ashtu të njëjta ose të përafërta. Kështu për shembull, formime vendbanimesh në zonat ekonomike ose fillimet e tyre si aglomeracione të banuara nga familje me lidhje farefisnie, janë gjerësisht të njohura në të gjitha krahinat e vendit. Kritere të njëjta të organizimit të hapësirës urbane janë zbatuar në shumë qendra qytetare. Ansamble apo ndërtime me funksione të reja të jetës qytetare gjithashtu u krijuan në disa qendra të vendit. Ekzistenca e komplekseve ndërtimore për plotësimin e nevojave të familjeve të mëdha ishte e njohur në disa krahina. Rëndësia e disa ambienteve bazë ishte e pranueshme në kompozimin e tipave të ndryshëm të banesës. Organizimi, mobilimi dhe pajisja e dhomës së miqve gjen paralele të njëjta në tipa të ndryshëm banese. Parapëlqimi për tipare të caktuara konstruktive e arkitektonike ka qenë i njëjtë për krahina e qendra të ndryshme etj.

Ngjashmëritë në program, si dhe zbatimi i kritereve të njëjta për zgjidhjen e kërkesave ka sjellë në shumë raste përkime në aspekte apo elemente të veçanta të veprimtarisë ndërtimore në krahina e qendra të ndryshme. Por, a bien në kontradiktë këto përkime me shpërndarjen gjeografike të tipologjisë dhe si duhen kuptuar ato?

Duke vendosur në bazë të klasifikimit tipologjik një kriter, ndonëse themelor dhe që pasqyron një pjesë të rëndësishme të mënyrës së jetesës, siç është kompozimi planimetriko-vëllimor, është pranuar gjithashtu dhe fakti që këtij kriteri të mos i nënshtrohen të gjithë përbërësit e krijimtarisë ndërtimore. Kështu që, duke njohur ligjësitë e zhvillimit të këtyre përbërësve, mund të përdoren kritere të tjera klasifikuese, të cilat sjellin rigrupime krahinash apo qendrash dhe përligjin ngjashmëritë në aspektet apo elementet e veçanta të tyre.

Nga ana tjetër, duke u nisur nga analiza e materialit faktik, rezultoi se realizimi konkret i kërkesave dhe i kritereve të njëjta apo të ngjashme është i ndryshëm në krahina e qendra të ndryshme. Në disa raste këto dallime formojnë variante të një strukture tipologjike, në raste të tjera mund të përbëjnë shfaqje tipologjike të veçanta. Kjo dukuri rrjedh nga vetë natyra e raportit ndërmjet mënyrës së jetesës dhe asaj të të banuarit. Mënyra e të banuarit, ndonëse është pjesë e mënyrës së jetesës, ruan një pavarësi relative ndaj kësaj të tërë. Kjo pavarësi vjen së pari, ngaqë faktorët ekonomikë e ato shoqërorë, nxitësit kryesorë për përkime e ndryshme të reja si të mënyrës së jetesës ashtu dhe të mënyrës së të banuarit, kombinohen në raporte nga më të ndryshmet, me fuqi veprimi jo të njëjtë në krahina, qendra dhe përbërës të ndryshëm të veprimtarisë ndërtimore.

Së dyti, faktorët ekonomikë e shoqërorë nuk veprojnë asnjëherë vetëm. Ata janë të mpleksur dhe bashkëveprojnë me një numër të shumtë

faktorësh të tjerë, të lidhur drejtpërdrejtë ose tërthorazi me mënyrën e të jetuarit. Të tillë janë për shembull, aftësitë dhe përvoja e mjeshtërve ndërtues, materiali që kanë ata në dispozicion, niveli i arritjeve të teknikës dhe teknologjisë së ndërtimit, terreni e klima ku ndërtohet, tradita e ngulitur, karakteri dhe dendësia e lidhjeve me krahina apo vende fqinje, ndikimet eventuale, tiparet e formimit estetik e shpirtëror të banorëve etj. Këta faktorë luajnë një rol jo të papërfillshëm në proceset tipologjike dhe, ndonjëherë, në etapa të caktuara, fitojnë një rol parësor.

Së treti, kalimi nga shtrimi i kërkesave deri te materializimi i tyre në vepër kalon edhe nëpërmjet një filtri tjetër, *kulturës së të banuarit*. Me kulturë banimi do të kuptojmë jo sasinë e kërkesave që ngre porositësi, por nivelin cilësor si dhe shkallën artistike të realizimit të tyre në vepër. Kultura e banimit nuk shfaqet vetëm në ndërtimet e zhvilluara. Ajo është e pranishme edhe në ndërtimet e thjeshta e primitive. Në banesat përdhese njëkthinëshe, mjafton një ndarje e brendshme për të diferencuar disa funksione, për shembull, vegimi i bagëtive nga hapësira për njerëzit ose, në banesat përdhese dykthinëshe, përqëndrimi i hyrjes kryesore, formimi i një korridori për shpërndarjen e lëvizjes në ambiente me funksione të ndryshme, ose krijimi i ndarjeve të veçanta për kurorët e reja në ambientet ekzistuese e plot shembuj të tjerë që përmbajnë në vetvete një embrion zhvillimi të mëtejshëm tipologjik, dëshmojnë për një kuptim më të gjerë të kulturës së banimit. Niveli i kësaj kulture në krahina, qendra e periudha të ndryshme nuk është i njëjtë, çka sjell dhe dallime në realizimet brenda një tipi, një krahine apo qendre, si dhe ndërmjet tipave, krahinave e qendrave të ndryshme.

Siç shihet nga parashtrimi i mësipërm, marrëdhëniet ndërmjet mënyrës së të banuarit janë tepër komplekse dhe të ndërlikuara. Për këtë arsye, njohja e karakterit të këtyre marrëdhënieve, nga njëra anë, dhe njohja e mirë e çdo gjymtyre, nga ana tjetër, do të krijojë mundësi të shpjegohen dhe të interpretohen anë të ndryshme të këtyre marrëdhënieve, të cilat do të plotësojnë tablonë, e mënyrës së jetesës të popullit tonë gjatë historisë shekullore të tij.

LITERATURA E PËRDORUR

1. A. Baçe, A. Meksi, E. Riza, Gj. Karaickaj, P. Thomo, «Historia e Arkitekturës Shqiptare (maket)», Tiranë, 1979.
2. A. Muka, «Banesa fshatare në Malësinë e Tiranës gjatë shek. XIX dhe fillimit të shek. XX», «Etnografia shqiptare» 9, 1978.
3. E. Riza, «Vështrim mbi urbanistikën e qytetit shqiptar (shek. XII-XX)», «Monumentet», 14, 1977.
4. E. Riza, «Arkitektura popullore në qytetet tona gjatë shek. XVIII-XIX», «Kultura popullore», 2, 1980.
5. E. Riza, «Banesa qytetare shqiptare gjatë gjysmës së dytë të shek. XIX deri rreth çerekut të parë të shek. XX», «Monumentet», 20, 1980.
6. E. Riza, P. Thomo, «Karakterit dhe tiparet e vendbanimeve dhe të banesës fshatare në shek. XIV-XVIII», «Kultura popullore», 2, 1983.
7. P. Thomo, «Aspekte të njësisë dhe larmisë në arkitekturën tonë popullore», «Kultura popullore», 1, 1981.
8. P. Thomo, «Qyteti i Korçës dhe arkitektura popullore shqiptare gjatë gjysmës së dytë të shek. XIX dhe fillimit të shek. XX», «Kultura popullore», 1, 1987.
9. S. Pulaha, «Qytetet shqiptare nën regjimin feudal ushtarak osman gjatë shek. XV-XVI», «Monumentet», 1, 1984.